

N A C R T

Na osnovu člana 24. Zakona o državnoj službi u institucijama Bosne i Hercegovine ("Službeni glasnik BiH", br. 19/02, 35/03, 4/04, 17/04, 26/04, 37/04, 48/05, 2/06, 32/07, 43/09, 8/10 i 40/12), člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), člana 1. stav (1) tačka d), člana 4. stav (1) tačka d) i člana 6. stav (2) Odluke o kriterijima za utvrđivanje novčane naknade za rad u upravnim odborima, nadzornim i drugim odborima i drugim radnim tijelima iz nadležnosti institucija Bosne i Hercegovine ("Službeni glasnik BiH", br. 19/09 i 10/12), Vijeće ministara Bosne i Hercegovine, na prijedlog Agencije za državnu službu Bosne i Hercegovine, na ____ . sjednici održanoj ____ . 2017. godine, donijelo je

O D L U K U **O IZMJENI I DOPUNI ODLUKE O PROPISIVANJU KRITERIJA ZA** **UTVRĐIVANJE VISINE NAKNADA ČLANOVIMA KOMISIJA ZA IZBOR** **DRŽAVNIH SLUŽBENIKA**

Član 1.

U Odluci o propisivanju kriterija za utvrđivanje visine naknada članovima komisija za izbor državnih službenika ("Službeni glasnik BiH", br. 55/10 i 44/16), u članu 2. stav (3) se mijenja i glasi:

“(3) Visina naknade članu komisije za izbor, u skladu sa stavom (2) ovog člana, određuje se na sljedeći način:

- a) Članu komisija za izbor rukovodećeg državnog službenika i šefa unutrašnje organizacione jedinice:
 - 1) do 5 kandidata u visini od 100 konvertibilnih maraka;
 - 2) od 6 do 15 kandidata u visini od 200 konvertibilnih maraka;
 - 3) 16 i više kandidata u visini od 300 konvertibilnih maraka.
- b) Članu komisija za izbor nerukovodećeg državnog službenika – stručnog saradnika, višeg stručnog saradnika i stručnog savjetnika:
 - 1) do 5 kandidata u visini od 50 konvertibilnih maraka;
 - 2) od 6 do 15 kandidata u visini od 100 konvertibilnih maraka;
 - 3) od 16 do 30 kandidata u visini od 200 konvertibilnih maraka;
 - 4) 31 i više kandidata u visini od 300 konvertibilnih maraka.

Član 2.

U članu 2. iza stava (3) dodaje se novi stav (4) koji glasi:

„(4) Kada komisija za izbor u jednoj konkursnoj proceduri bira kandidate za popunjavanje više radnih mjesta državnih službenika, od kojih su neka radna mjesta navedena u članu 2. stav (3) tačka a), a druga radna mjesta državnih službenika su ona navedena u članu 2. stav (3) tačka b), visina naknade članu komisije za izbor određuje se na način propisan članom 2. stav (3) tačka a) ove odluke.

Član 3.

Član 6. mijenja se i glasi:

„Član 6.

(1) Odredbe ove odluke primijenit će se na sve komisije za izbor koje nakon njenog stupanja na snagu održe intervju primjenom Okvira kompetencija u skladu sa poglavljem III. (čl. 28. – 38.) Pravilnika o karakteru i sadržaju javnog konkursa, načinu provođenja intervjua i obrascima za provođenje intervjua („Službeni glasnik BiH“, br. 63/16 i 21/17).

(2) Na komisije za izbor koje intervju ne održe primjenom Okvira kompetencija, u skladu sa članom 39. Pravilnika o karakteru i sadržaju javnog konkursa, načinu provođenja intervjua i obrascima za provođenje intervjua, odredbe ove odluke neće se primijeniti, nego će se plaćanje članovima komisije za izbor izvršiti po starom sistemu plaćanja odnosno po članu 2. stav (3) Odluke o propisivanju kriterija za utvrđivanje visine naknada članovima komisija za izbor državnih službenika („Službeni glasnik BiH“, br. 55/10 i 44/16), koji će se u ovakvom slučaju primjenjivati u prelaznom periodu, a najduže do kraja 2017. godine.

Član 4.

Ova odluka stupa na snagu danom donošenja i objavljuje se u „Službenom glasniku BiH“.

VM broj: /17
____. _____ 2017. godine
Sarajevo

Predsjedavajući
Vijeća ministara BiH
dr. Denis Zvizdić

O B R A Z L O Ž E N J E

A – PRAVNI OSNOV

Pravni osnov za donošenje ove odluke nalazi se u članu 24. Zakona o državnoj službi u institucijama Bosne o Hercegovine ("Službeni glasnik BiH", broj 19/02, 35/03, 4/04, 17/04, 26/04, 37/04, 48/05, 2/06, 32/07, 43/09, 8/10 i 40/12), koji regulira sastav Komisije za izbor državnih službenika, način njenog rada i pravo na naknadu za rad članova komisije a koju utvrđuje i isplaćuje Agencija za državnu službu, članu 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), prema kojem Vijeće ministara BiH u ostvarivanju svojih prava i dužnosti donosi odluke i druge akte, te u Odluci o kriterijima za utvrđivanje novčane naknade za rad u upravnim odborima, nadzornim i drugim odborima i drugim radnim tijelima iz nadležnosti institucija Bosne i Hercegovine ("Službeni glasnik BiH", br. 19/09 i 10/12), kojom su u članu 1. stav (1) tačka d), članu 4. stav (1) tačka d) i članu 6. stav (2) precizirani kriteriji i način utvrđivanja visine novčane naknade za članove radnih tijela koje rukovodilac institucije BiH imenuje na osnovu posebnih zakona s ciljem neovisnog provođenja zakonom utvrđenih procedura izbora po javnim oglasima vezano za prijem uposlenika u radni odnos u institucijama BiH.

B – RAZLOZI ZA DONOŠENJE ODLUKE

Osnovni razlog donošenja ove odluke je u potrebi da se razdvoji i na različit način utvrdi naknada članovima komisije za izbor rukovodećih državnih službenika u odnosu na članove za izbor nerukovodećih državnih službenika s obzirom na to da se za pozicije rukovodećih državnih službenika prijavljuje znatno manji broj kandidata nego na ostala nerukovodeća državnoslužbenička randna mjesta, a član komisije za izbor rukovodećeg državnog službenika da bi profesionalno mogao obaviti svoj posao mora imati znatno veće profesionalno iskustvo, znanje i poziciju u odnosu na člana za izbor nerukovodećeg državnog službenika. Osim navedenog, i sam izbor rukovodećeg državnog službenika pored toga što je zahtjevniji u smislu pripreme većeg broja adekvatnih pitanja u odnosu na broj zadatka koje rješavaju nerukovodeći državni službenici, sa sobom nosi i veću odgovornost kod izbora najboljeg kandidata. Takođe, primjenom Okvira kompetencija u skladu sa Pravilnikom o karakteru i sadržaju javnog konkursa, načinu provođenja intervjua i obrascima za provođenje intervjua, sam postupak provođenja intervjua gdje se i utvrđuju kompetencije za svaku poziciju, a čiji broj za rukovodeće državne službenike je znatno veći u odnosu na broj kompetencija koje se provjeravaju na intervjuu za nerukovodeće državne službenike, ide u prilog činjenici da znatno obimniji i teži posao člana komisije za izbor rukovodećeg državnog službenika po jednom kandidatu objektivno zahtijeva i veću naknadu u odnosu na člana komisije za izbor nerukovodećeg državnog službenika.

C – USKLAĐENOST PROPISA SA EVROPSKIM ZAKONODAVSTVOM

Analizom sekundarnih izvora prava Evropske unije utvrđeno je da materija koja se utvrđuje Prijedlogom odluke nije regulisana pravno obavezujućim aktima Evropske unije, te u skladu sa navedenim nije moguće dati ocjenu usklađenosti.

D – OBRAZLOŽENJE PREDLOŽENIH RJEŠENJA

Članom 1. predloženog teksta mijenja se stav (3) člana 2. Odluke na način da se na različit način, a kako je decidno prisano, po broju kandidata vrednuje odnosno isplaćuje naknada članu komisije za izbor rukovodećeg državnog službenika u odnosu na člana komisije za izbor nerukovodećeg državnog službenika.

Član 2. odnosi se na novi stav (4) člana 3. osnovnog teksta, a koji precizira način plaćanja člana komisije za izbor u situaciji kada jedna komisija za izbor sprovodi konkursnu proceduru za više radnih mjesta državnih službenika od kojih su neka rukovodeća a neka nerukovodeća.

U članu 3. predloženog teksta u mijenja se postojeći član 6. na način da se sada plaćanje članovima komisija za izbor državnih službenika veže za striktnu primjenu na usmenom dijelu stručnog ispita Okvira kompetencija u skladu sa Pravilnikom o karakteru i sadržaju javnog konkursa, načinu provođenja intervjua i obrascima za provođenje intervjua, a samo u prelaznom periodu odnosno do kraja tekuće 2017. godine kada je još moguće pojedine konkursne procedure sprovesti bez sprovođenja Okvira kompetencija, plaćanje člana komisije za izbor u ovom slučaju obaviti će po starom sistemu.

Član 4. Odluke odnosi se na stupanje na snagu iste.

E – OPIS KONSULTACIJA VOĐENIH U POSTUPKU IZRADE ODLUKE

Prijedlog odluke je dostavljen institucijama koje mogu dati primjedbu na isti s obzirom na svoje nadležnosti, a to su: Ministarstvo finansija i trezora Bosne i Hercegovine, Ministarstvo pravde Bosne i Hercegovine, Ured za zakonodavstvo Vijeća ministara Bosne i Hercegovine, a obavljene su i e-konsultacije kao i konsultacije u skladu sa članom 6. Pravila za konsultacije u izradi pravnih propisa („Službeni glasnik BiH“, br. 81/06 i 18/14), i Instrukcijom za provođenje pravila za konsultacije u izradi pravnih propisa u Agenciji za državnu službu Bosne i Hercegovine.

F- POTREBNA FINANSIJSKA SREDSTVA

Za sprovođenje ove odluke neće biti potrebna dodatna finansijska sredstva, budući da su postojeća sredstva u budžetu Agencije dovoljna za sprovedbu iste, uzimajući u obzir raspoloživa sredstva na budgeztskoj stavci ugovorene usluge – izdaci za rad komisija, kao i dinamiku trošenja istih u periodu 2015. -2016. godine.

